

THLANPIAL

Mizorama Kristianna lo luh hma a kan pi leh pute khan thih hnu thlarau khawvel kharin dan mumal tak an nei a. Mitthi khua leh Pialral te an ti a. Thih hnuah Thlarau chu chutah chuan a kal niin an ngai a ni.

Mitthi thlarau chu a Ludip atanga chhuakin, Tungchaw a zawh a, Khanchhukah a phei zel a, Liangah kal zelin Kawmchar lam atangin Ditipah a chhuak a, tichuan Rihdil panin a kal ta thin niin an ngai. Mitthi thlaraute hian Rih dil an panna kawngah hian THLANPIAL an paltlang thin niin an ngai a. Thlanpial, Thlanpial kawt, Thlanpial pûk ti tein an sawi thin.



THLANPIAL chu awih pang, lungpui kara kalkhân awm a ni ber a. Hmar lam hawia kalin ding lam chu Lung bang, pûk ang lek lek a ni a. Mitthi an awmin chulai Lung bangah chuan thai rin a lo awm thar ziah thin a. Mitthi thlarau thai rân niin an ngai a, Hmeichhe thlarauin a Thir khai a a thai niin an ngai deuh ber.

Thenkhat chuan, tun thlengin a la râng thar zel thin niin an sawi a. Mahse, thai rânna hi a tam tawh em avang leh helai tlawh tuten an thar belh ve ni a ngaih theih a tam a, tun thlenga mitthi an awm a thai ran thar a awm leh awm loh chu finfiah mai a har deuh.

Mitthi thlarau chu kal zelin tlang pakhat mihring, nungdama la awmte fiah taka an lan theihna hmun an thleng a, chu chu Hringlang tlang an ti a. Lungleng a tap zawih zawih chungin an rawn thlir let thin a ni. Chu tlângah chuan tui fim tak a awm a, an tap nasa, dangro tuihal chuan chu tui chu an in a, an lunglenna chu a reh ta vek mai thin a, a hmingah pawh Lungloh Tui an ti a.

Tin, chulai velah chuan Pangpar mawi tak a lo vul chûk mai a, chu pangpar chu a thlih a an tawn chuan minung ram lam an hawi kir thei ta lo a, a pangpar hmingah Hawilopar an vuah a ni.

Tichuan kal zelin Pawla kawt Zingvanzawl an tih mai chu an thleng a. Hei hi Mitthi khua leh Pialral kawtchhuah a ni. Pawla chu Sairawkherh nen chulaiah chuan a lo awm thin a, mitthi khua leh Pialral a kal tur, chulai rawn paltlangtute chu a lo sai thin a ni awm e.

THLANPIAL lam kha chhunzawm leh lawk ila. Thlanpial hi, tuna Mizoram hmar lam, Tuivai lui leh Tuivawl luiin a kar cheh, Manipur ramri hrul a awm a ni a. Thlanpial hi Vanbawng ram, tuna

N.Khawlek khaw ram chhunga awm a ni a. British hunlai khan, Khandaih lal Vanphunga lal ram a ni.

Thlanpial awmna N.Khawlek ah hian 1901 khan Hrangchhunga a lal a, mahse an insawn kual thin a. Bawrsap Hazlett khan Khandaih lal Vanphunga Sailo chu a tlawh a. A tira Kristian dodaltu Vanphunga chuan, rin loh deuhin a lo dawngsawng tha viau mai a. Lawmthu sawi nan Bawrsap chuan Vanphunga chu Khandaih atanga THLANPIAL ram thleng hian a pe ta a.

Vanphunga sailo chuan kum 1910-ah Vanbawngah Bawk a khawh a, kum 1911-ah a kai a. A fapa Liankiauva chu lal ah a thut tir zui a. Kum 1926 ah Bawrsap Parry-a thupek angin Vanbawng atangin N.Khawleka an insuan a, mahse a tam zawk chu Vanbawngah an let leh a, tun thlengin N.Khawlek leh Vanbawng ah hian an awm zui ta a ni.

Vanbawng ram Vawkte lungkawnah hian Vanphunga Lungdawh a awm a, chu Lungdawh ah chuan tihian a inziak-

***Vanbawng ram hi a za in Hazlett
Bawrsapina ka thlahte thleng a
Rochun turin min pe***

***Phun ni
22 March 1917***

Vanphunga

Thlanpial hmun hi Mitthi thlarau ten an tlawh ngei tih an rinna tizualtu thawnthu pakhat, N Khawlek pa, pa fel tak Pu Valtea sawi dan hi kan zep tel leh lawk –

Tumkhat chu Pasaltha Tlangchhunga, Suangpuilawn lam mi chu Rungdil kam velah a ramvak a. Tuivawl dung chu a zawh thla zel a. Thlanpial ram khamah lawn chhovin, Thlanpial kawt a thlen chuan khua a thim ta si a, chutah chuan a riak ta a. Zannah chuan mihring thawm a hre ta a, a’n ngaithla Chiang a, a nupui tawng ni ngeiin a hria a, a lo châng ta a. Tumah a hmu thei lo a, mahse a nupuiin tawng bawrh bawrh paha a zawn a lo thlen chuan a kuah ta thut a, a chelh ta tlat a.

A nupui chuan, “E khai, min thlah rawh, mitthi leh minungte chu awm kawp thei kan ni tawh hlei nem. Naupang lah engmah ka hrilh si lo a, kan Bellam chhunga Sarep ka dahte kha naupang ka hrilh bawk si lo” a ti a. A pasal Tlangchhunga chuan a thlah ta a. A ngaih tha lo chu, khua a var ve leh a haw ta vang vang a. In a thlen chuan, a nupui chu a lo thi tak tak a. A nupui sawi ang khan an rappuichungsang a Bellam chhungah te chuan Sarep chu a lo awm tak tak bawk a.

Chuta tang chuan, upa in Mitthi thlarau ten Thlanpial kawng an zawh a an paltlang ngei tih an sawi chu tak takah an ngaih leh zual phah a ni tiin Thlanpial kan tlawh ni 22.06.2017 khan min hrilh a ni. A thawnthu hi Mitthi thlarauin Rihdil an paltlang ngei tihfiahna thawnthu an sawi thin, Pasaltha pakhat Rihdil vela ramvak, a nupui thlarauvin Rihdil lam pana mitthi khaw kawng a zawh lai a lo man chanchin nen a inang hle a. Thil thuhmun, sawi dan dang hret pawh a ni mai thei.

Engpawhnise, pi leh pute khan mitthi thlarau chu Rih dil kaltlang angin an ngai vek a. Mitthi khua leh Pialral thlen hma hian engemaw ti chung chu minung zinga la awm angin an ngai a. Pawi ho chuan Zinghmuh a kal hmasa ang ten an ngai a, Hmar chuan THLANPIAL hi kal tlang niin an ngai bawh a ni awm e.



Buata Bawihlung
25.06.2017 Sunday